

Inatsisartut Suleriaasianni § 33 naapertorlugu aalajangiiffigisassatut siunnersuut manna Naalakkersuisut saqqummiuppaat:

**Uunga siunnersuut: IAEA-imi atomip nukinganit atortussianik inissisimaffiini isumannaarinissaq pillugu nunani tamalaani isumaqatigiisummut allannguummumut Namminersorlutik Oqartussat akuersinissaat pillugu oqaaseqaateqarnissaq pillugu Inatsisartut aalajangiiffigisassaattut siunnersuut**

(Inuusutissarsiornermut, Suliffeqarnermut, Niuernermet Nunanullu Allanut Naalakkersuisoq)

**Tunngavilersuutit**

Siunnersuut inassuteqaatit ”Uranimik piiaaneq avammullu annissuineq pillugu nalunaarusiaq”-mi allassimasut ilagaat. Nunani tamalaani isumaqatigiissut aatsitassanik qinngornernik ulorianartunik akulinnik piiaanermut toqqaannartumik tunngassuteqanngilaq, tamatumunnga taarsiullugu atomip nukinganit atortussiat susassaqqanngitsunit pissarsiarineqarnissaannut isumannaarinissamut kiisalu tamatumunnga naleqquttumik pineqaatissiissuteqarnissamik piumasaaqatinut tunngassuteqarpoq.

Danmark-ip qinngornerit ulorianartut inissisimaffiini illersorneqarnissaat isumaqatigiissut juni 1980-imi atsiorpaa, isumaqatigiissullu atortuulersillugu september 1991-imi. Danmark-ip isumaqatigiisummik atortuulersitsinermini isumaqatigiissutip Kalaallit Nunaannut atortuulernissaanut tunuarsimaarutaasunik nalunaaruteqanngilaq.

2005-ip aallartinnerani aallartitat ataatsimiinnissaannut aggersaasoqarpoq, “rules of procedure” naapertorlugu aallartitat akornanni isumaqatigiisummi allannguutinik akuersissuteqartarfiusumut.

Ulloq 8. Juli 2005 ataatsimiittut paaseqatigiiffiusumik isumaqatigiissutigaat inissisimaffinni isumannaarisarnermut aalajangersakkat. Allannguuteqartitsilluni isumaqatigiissut “Qingornerit ulorianartut qinngornernullu ulorianartunut sanaartukkat inissisimaffimmini isumannaarneqartarnissaat pillugu isumaqatigiissut” atortuulersinneqanngilaq. Isumaqatigiissut atortuulissaq nunat ilaasortaasut 2/3-del-iisa isumaqatigiissut siulleq aallaaviusoq aamma akuersissutigereerpassuk.

**Nunani tamalaani isumaqatigiissutip imarisai:**

Atomip nukinganit atortussianik inissisimaffiini isumannaarinissaq pillugu nunani tamalaani isumaqatigiissut atomip nukinganit atortussiassat, assersuutigalugu sakkussianik tunisassiornermi ilaatinneqarsinnaasut, susassaqqanngitsunit pissarsiarineqqannginnissaannik isumannaarneqarnissaasa, pingaarnertigut qulakkeerneqarnissaanut tunngassuteqarpoq. Nunani tamalaani isumaqatigiissut aalajangersimanerusumik atortussiat nunani tamalaani assartorneqarneranni isumannaarneqarnissaannut, ilanngullugu atortussiat naalagaaffimmit ilaasortaasumit avammut annissorneqarneranni, aamma nunani allani illersuineramik iliuusissanik aalajangersaasoqartoqarsimasoq, naalagaaffiit ilaasortaasut misissortassagaat. Atomip nukinganit atortussianik inissisimaffiini isumannaarinissaq pillugu nunani tamalaani isumaqatigiissut atomip nukinganit atortussianut tamaginnut tunngassuteqanngilaq. Taamaalilluni saffiugassat, uranimik akoqaraluartulluunniit, pineqartunut ilaanngillat; atomip nukinganit atortussiassanut suliarinninnerni alloriarnerit ikittuinnaat aqqusaarlugit suliarineqarlutik atomip nukinganit sakkussianik tunisassiarineqarnissamut naleqquttunut nunani tamalaani isumaqatigiissut tunngassuteqarpoq.

**Pisortanut allaffissornikkut aningaasaqarnikkullu sunniutaasussat**

Tunuarsimaarnissamut aalajangersakkap atortuujunnaarnerata imaaliinnarluni kingunerisassaa qinngornernut ulorianartunut Kalaallit Nunaanni illersuinissamut inatsisiortoqarnissaa, inatsisinilu aalajangersarneqassasoq isumaqatigiisummi aalajangersakkanut aalajangersimasunut tunngatillugu pineqaatissiisoqarsinaalernissaa, ilaatigut qinngornernit ulorianartunut atortussianik tillinniarnaq, qinngornernik ulorianartunik pissusissarititaanngitsumik periaaseqarluni pissarsineq (assersuutigalugu pinerluuteqarnikkut) aamma piaaraluni ajoqusiisumik qinngornernik ulorianartunik atuineq). Inatsisiliornikkut aamma isumannaarniarneqassaaq Kalaallit Nunaanniit innuttaasunik tunniussisoqarsinnaanissaa, iliuutsit isumaqatigiisummik unioqqutitsineruppata atomip nukinganit atortussiat inissisimaffiini isumannaarisarneq eqqarsaatigalugu.

Naalackersuisut siunnersuuteqassapput UKA2015-imi qinngornerit ulorianartut pillugit aamma qinngornernut ulorianartunut illersorneqarnissaq pillugu.

**Inuussutissarsiortunut allaffissornikkut aningaasaqarnikkullu sunniutaasussat**

Soqanngilaq

**Attaveqaqatigiinneq**

Oqaaseqaateqartoqarenerani, Kalaallit Nunaanni atuutsitsilernissaq siunertaralugu, oqartussaasut attuumassuteqartut attaveqarfigineqassapput.

## **Tusarniaaneq**

Inatsisartut aalajangiiffigisassaattut siunnersuut 2015-imi 12. juunimiit 6. aggustimut Naalackersuisut tusarniaanermut nittartagaanniippoq. Tusarniaanermut akissutininik tigunsaqartoqarsimanngilaq.

Taamatut oqaaseqarlutik Naalackersuisut inassutigaa, IAEA-imi atomip nukinganit atortussianik aamma atomip nukinganik nukissiorfinnik inissisimaffiini isumannaarinissaq pillugu nunani tamalaani isumaqatigiissut, Namminersorlutik Oqartussat akuerissagaat, Inatsisartut aalajangissasut.

## **Ilanngussat:**

- 1) Atomip nukinganit atortussianik inissisimaffiini isumannaarinissaq pillugu Det Internationale Atomenergiagentur-imi nunani tamalaani isumaqatigiissutip naalisarnera
- 2) Allannugaaq IAEA-imi atomip nukinganit atortussianik aamma atomip nukinganik nukissiorfinnik inissisimaffiini isumannaarinissaq pillugu nunani tamalaani isumaqatigiissut.
- 3) IAEA-imi atomip nukinganit atortussianik aamma atomip nukinganik nukissiorfinnik inissisimaffiini isumannaarinissaq pillugu nunani tamalaani isumaqatigiissut.